

太上感應篇

文昌帝君陰騭文

淨空恭書






太上感應篇

淨空恭書





太上感應篇

明義章第一

太上曰。禍福無門。惟人自召。善惡之報。如影隨形。

示警章第二

是以天地有司過之神。依人所犯輕重。以奪人算。算減則貧耗。多逢憂患。人皆惡之。刑禍隨之。吉慶避之。惡星災之。算盡則死。

鑒察章第三

又有三台北斗神君。在人頭上。錄人
罪惡。奪其紀算。又有三尸神。在人
身中。每到庚申日。輒上詣天曹。言
人罪過。月晦之日。竈神亦然。凡人
有過。大則奪紀。小則奪算。其過大
小。有數百事。欲求長生者。先須避
之。

積善章第四

是道則進。非道則退。不履邪徑。不欺暗室。積德累功。慈心於物。忠孝友悌。正己化人。矜孤恤寡。敬老懷幼。昆蟲草木。尤不可傷。宜憫人之凶。樂人之善。濟人之急。救人之危。見人之得。如己之得。見人之失。如己之失。不彰人短。不炫己長。遏惡揚善。推多取少。受辱不怨。受寵若

驚。施恩不求報。與人不追悔。

善報章第五

所謂善人。人皆敬之。天道佑之。福祿隨之。衆邪遠之。神靈衛之。所作必成。神仙可冀。欲求天仙者。當立一千三百善。欲求地仙者。當立三百善。

諸惡章第六

苟或非義而動。背理而行。以惡爲能。
忍作殘害。陰賊良善。暗侮君親。慢
其先生。叛其所事。誑諸無識。謗諸
同學。虛誣作僞。攻訐宗親。剛強不
仁。狠戾自用。是非不當。向背乖宜。
虐下取功。諂上希旨。受恩不感。念
怨不休。輕蔑天民。擾亂國政。賞及
非義。刑及無辜。殺人取財。傾人取

位。誅降戮服。貶正排賢。凌孤逼寡。
棄法受賂。以直爲曲。以曲爲直。入
輕爲重。見殺加怒。知過不改。知善
不爲。自罪引他。壅塞方術。訕謗聖
賢。侵凌道德。射飛逐走。發蟄驚棲。
填穴覆巢。傷胎破卵。願人有失。毀
人成功。危人自安。滅人自益。以惡
爲好。以私廢公。竊人之能。蔽人之
善。形人之醜。訐人之私。耗人貨財。

離人骨肉。侵人所愛。助人爲非。逞志作威。辱人求勝。敗人苗稼。破人婚姻。苟富而驕。苟免無恥。認恩推過。嫁禍賣惡。沽買虛譽。包貯險心。挫人所長。護己所短。乘威迫脅。縱暴殺傷。無故剪裁。非禮烹宰。散棄五穀。勞擾衆生。破人之家。取其財寶。決水放火。以害民居。紊亂規模。以敗人功。損人器物。以窮人用。見他榮

貴。願他流貶。見他富有。願他破散。
見他色美。起心私之。負他貨財。願
他身死。干求不遂。便生咒恨。見他
失便。便說他過。見他體相不具而笑
之。見他才能可稱而仰之。埋蠱厭人
用藥殺樹。恚怒師傅。抵觸父兄。強
取強求。好侵好奪。擄掠致富。巧詐
求遷。賞罰不平。逸樂過節。苛虐其
下。恐嚇於他。怨天尤人。呵風罵雨。

鬪合爭訟。妄逐朋黨。用妻妾語。違父
母訓。得新忘故。口是心非。貪冒於
財。欺罔其上。造作惡語。讒毀平人。毀
人稱直。罵神稱正。棄順效逆。背親
向疎。指天地。以證鄙懷。引神明。
而鑑猥事。施與後悔。假借不還。分
外營求。力上施設。淫欲過度。心毒
貌慈。穢食餒人。左道惑衆。短尺狹
度。輕秤小升。以僞雜真。採取奸利。

壓良爲賤。謾驀愚人。貪婪無厭。咒
詛求直。嗜酒悖亂。骨肉忿爭。男不
忠良。女不柔順。不和其室。不敬其
夫。每好矜誇。常行妒忌。無行於妻
子。失禮於舅姑。輕慢先靈。違逆上
命。作爲無益。懷挾外心。自咒咒
他。偏憎偏愛。越井越竈。跳食跳人
損子墮胎。行多隱僻。晦臘歌舞。朔
旦號怒。對北涕唾及溺。對竈吟咏及

哭。又以竈火燒香。穢柴作食。夜起
裸露。八節行刑唾流星。指虹霓。輒
指三光。久視日月。春月燎獵。對北
惡罵。無故殺龜打蛇。

惡報章第七

如是等罪。司命隨其輕重。奪其紀算。
算盡則死死有餘責。乃殃及子孫。
又諸橫取人財者。乃計其妻子家口以
當之。漸至死喪。若不死喪。則有水

火盜賊。遺忘器物。疾病口舌諸事。以當妄取之直。又枉殺人者。是易刀兵而相殺也。取非義之財者。譬如漏脯救飢。正鳩酒止渴。非不暫飽，死亦及之。

指徽章第八

夫心起於善。善雖未爲。而吉神已隨之。或心起於惡。惡雖未爲。而凶神已隨之。

悔過章第九

其有曾行惡事。後自改悔。諸惡莫作。衆善奉行。久久必獲吉慶。所謂轉禍爲福也。

力行章第十

故吉人語善視善行善。一日有三善，三年。天必降之福。凶人語惡視惡行惡。一日有三惡。三年。天必降之禍。胡不勉而行之。

文昌帝君陰騭文

文昌帝君陰騭文

帝君曰。吾一十七世爲士大夫身。未嘗虐民酷吏。救人之難。濟人之急。憫人之孤。容人之過。廣行陰騭。上格蒼穹。人能如我存心。天必錫汝以福。於是訓於人曰。昔于公治獄。大興駟馬之門。竇氏濟人。高折五枝之桂。救蟻，中狀元之選。埋蛇，享宰相之榮。欲廣福田，須憑心地。行時時之方便。作種種之陰功。利物利人。

修善修福。正直代天行化。慈祥爲國
救民。忠主孝親。敬兄信友。或奉眞
朝斗。或拜佛念經。報答四恩。廣行
三教。濟急如濟涸轍之魚。救危如救
密羅之雀。矜孤恤寡。敬老憐貧。措
衣食，周道路之饑寒。施棺槨，免屍
骸之暴露。家富提携親戚。歲饑賑濟
鄰朋。斗秤須要公平。不可輕出重入。
奴僕待之寬恕。豈宜備責苛求。印造
經文。創修寺院。捨藥材以拯疾苦。

施茶水以解渴煩。或買物而放生。或持齋而戒殺。舉步常看蟲蟻。禁火莫燒山林。點夜燈以照人行。造河船以濟人渡。勿登山而網禽鳥。勿臨水而毒魚蝦。勿宰耕牛。勿棄字紙。勿謀人之財產。勿妬人之技能。勿淫人之妻女。勿唆人之爭訟。勿壞人之名利。勿破人之婚姻。勿因私讎，使人兄弟不和。勿因小利，使人父子不睦。勿倚權勢而辱善良。勿恃豪富而欺窮困。

善人則親近之，助德行於身心。惡人則遠避之，杜災殃於眉睫。常須隱惡揚善。不可口是心非。翦礙道之荆榛。除當途之瓦石。修數百年崎嶇之路。造千萬人來往之橋。垂訓以格人非。捐貲以成人美。作事須循天理。出言要順人心。見先哲於羹牆。慎獨知於衾影。諸惡莫作。衆善奉行。永無惡曜加臨。常有吉神擁護。近報則在己。遠報則在兒孫。百福駢臻。千祥

雲集。豈不從陰隲中得來者哉。

孚佑帝君心經

呂祖曰。

天生萬物。惟人最靈。非人能靈。實心是靈。心爲主宰。一身之君。役使百骸。區處羣情。物無其物。形無其形。稟受於天。良知良能。氣拘欲蔽。日失其真。此心既失。此身亦傾。欲善其身。先治其心。治心如何。即心治心。

以老老心，治不孝心。
以長長心，治不悌心。
以委致心，治不忠心。
以誠恪心，治不信心。
以恭敬心，治無禮心。
以循理心，治無義心。
以清介心，治無廉心。
以自愛心，治無恥心。
以積德心，治爲惡心。
以利濟心，治殘賊心。

以匡扶心，治傾陷心。
以仁慈心，治暴戾心。
以謙遜心，治傲慢心。
以損抑心，治盈滿心。
以儉約心，治驕奢心。
以勤慎心，治怠忽心。
以坦易心，治危險心。
以忠厚心，治刻薄心。
以和平心，治忿恚心。
以寬洪心，治褊窄心。

以傷身心，治沉湎心。
以妻女心，治姦淫心。
以果報心，治謀奪心。
以禍患心，治鬪狠心。
以正教心，治異端心。
以至信心，治大疑心。
以悠久心，治無恒心。
以始終心，治反覆心。
以施與心，治慳吝心。
以自然心，治勉強心。

以安分心，治非望心。
以順受心，治怨尤心。
以推誠心，治猜忌心。
以鎮定心，治搖惑心。
以中正心，治偏袒心。
以大體心，治細務心。
嗟乎人心。不治不純。如彼亂絲。不
理不清。如彼古鏡。不磨不明。如彼
劣馬。不勒不馴。我故說經。欲治人
心。人心得治。天地清寧。

偈曰。一切惟心心最危。

範天圍地發光輝。

天心卽在人心見。

人合天心天弗違。

※※※ 欢迎翻印 • 功德无量 ※※※

回 向

愿以此功德 庄严佛净土
上报四重恩 下济三途苦
若有见闻者 悉发菩提心
尽此一报身 同生极乐国

太上感應篇

文昌帝君陰騭文

印赠者：佛弟子：

赠送处：新加坡净宗学会

AMITABHA BUDDHIST SOCIETY
(SINGAPORE)


芽笼三十五巷二号 新加坡邮区三八七九三四

No. 2 Lorong 35 Geylang Singapore 387934

TEL: 65 744-7444 FAX: 65 744-4774







贈送結緣

COMPLIMENTARY COPY
HADIAH PERCUMA
PRINTED IN SINGAPORE